

湘

綺

樓

全

集

湘綺樓箋啟附六

目錄六

長沙湘潭王闓運字王父著

許篤齋一啟 魏槃阿一啟 趙伯璋一啟 常晴

生一啟 惠師儔一啟 吳董清一啟 劉峴莊四

啟 劉采九一啟 爽邵南一啟 孔措階一啟

胡翔清一啟 譚鏡清一啟 劉鏡清一啟 廖蓀

咳一啟 張雨珊一啟 馬話山一條 夏子新三

啟 陳復心二啟 楊彥規一啟 李仲山一啟

陳小石二啟 李勉林三啟 張子虞一啟 席沅

生一啟 曹東瀛一啟 曾仲伯一啟 張林士秋一

瞿子致

啓 陳六笙二啓 朱曼伯一啓 但少村二啓  
俞虞軒三啓 趙次山二啓 譚芝耘一啓 裴少  
岑一啓 龍驗仙二啓 端午樵一啓 黃花農一  
啓 陳完夫二啓 楊兆僊一啓 夏午詒一啓  
夏菽軒二啓 沈夢谿一啓 趙晴帆一啓 秦子  
質一啓 王子常一啓 程阮樵六啓 伍編修一  
啓 劉端亮一啓

湘綺樓箋啓附六終

目錄六終

湘綺樓箋啟卷第六

長沙湘潭主闈運字壬父著

與許生

前得書欣知慈躬康全聞當重來因未作復昨得信知  
定畱侍甚善甚善讀書日長事親日少震之言是也歸  
有餘師但以不能朝夕爲悵悵耳火食之說以拒虹田  
之徒若篤齋者方能食吾盤殮用獎勤劬尊公厚意猶  
以常典見待者也因使附還乞爲代達入伏未事所作  
俟秋涼諸生去盡乃當詳覈吾賢學行俱可大成惟濡  
染稍深於諸儒說猶暗有牽掣要當一求經證以廓胸

襟乃後參以眾家示不專輒徇名之意最難掃除舉世  
非之衷之於聖斯乃區區之志也嗚矢而已道在則何  
敢言此頌侍安

致魏同知

槃阿長兄先生侍者二紀重逢八旬歡聚故情彌重新  
別旋懷得手書相念拳拳卽知鄙悰之尤戀也臘遲寒  
淺年度春回吳門勝游更增遙憶闔運於冬至前抵長  
沙室如縣磬幸做縣志館致送千緡隨手開除一日而  
畢假不畱吳則此項早歸烏有天畱錢樹人挽小車公  
有同焉可爲一噓途中得詩一篇酬葉臨公錄請代致

又附拙著三種與鄭君共觀之湘中民慶有秋人家康  
樂莊田多穫營室可成明歲當在山版築鄉居差供餽  
粥妻子付之敝屣此則老兄未能耳邵去鹿來猶吾夔  
子譚興張廢翹足可期讀律諸公行亦倦矣徒供談柄  
何損雅懷江梅正花伏惟繇福不具

與趙同知

伯璋仁兄先生台席吳門快晤傾企風裁湘水遄歸遙  
瞻汪度過從稠密游宴豐勤愧乏酬儀但歌永好別後  
看吳鈔尙未見上游借重徽商息重楚客貂輕船到橋  
邊陴其笑矣闔連於十一月廿日抵長沙未久卽還敝

縣商度山居臘底始仍還省債家紛集今年僅償其半  
已費經營明歲決計入山誅茅結屋吳游煩費津館塵  
囂閉戶守貧庶無大悔家鄉豐稔穀價復昂敝莊欣欣  
大有起色此則苦中之一樂耳書此申謝敬頌年祺  
致常知縣

晴生仁弟親家台席八月得京邸書旋聞榮到以相見  
在近故未作答九月過省功兒乃欲北行以其少長鄉  
園宜觀上國因畱照料遂困長沙九弟來詢知近佳並  
得委任圭璋特達公道益彰濁世雖勞亦有名義功兒  
昨見按察已述鄙意督府則未知見否要俟請求也半

百雖輕正不易得非先公清節藩臺厚意何以致此但孤忠被謫當有特恩錄其子孫不從凡例今年歲暮不宜更煩竿牘明春必爲作文上之督撫以申私意敬帥必畱督蜀新撫雖無交情可因制臺轉達也初到官廳忌妒者多以緘默敬慎爲主恐弟尙有見才之意與俗官齟齬特以此告不作書亦此意也藩臬督撫時有齟齬屬員必不可代之分黨揔之大人恩典巴結差使之不遑斯乃候補祕訣耳書院偶有兒童戲劇皆已正辨所以辭館者以讀書不甚認真脩金又不敷用兩無所益非與道臺及諸門人鬧皮氣也閩運生平自視甚重

以爲自恭醕以下皆敬我者必不與人計較來書云云猶秀才習氣非公子及太耶所宜也承賜八女添裝適已還東未敢仍畱自用二表謹存鏡奩仍交夫人代收俟八女明年過鄂便以賜之閩運今冬尙未知所適或至鄂或還山視天氣爲定明春三月仍至東洲收束脩近又欲別開一局亦懶未暇諸女則避盜入城必不再至衡矣夫人至省寒雨纏綿未能迎款爲歉專此復謝卽頌邸福新喜

致惠同知

師僑仁兄大人閣下蘇臺重上新雨得朋文酒之游尤

欽雅度別後總襟人事未暇修箋亦以酬酢處繇若以  
例通謝反孤雅眷因循半載無日不瞻憶清暉也想捕  
務整飭水利流通州郡需材當復借重然仁兄兩司材  
也屈於閒官終當特達幸無亟歎塵魚矣小坡屬校廣  
韻已畢彼既入都有登科之望當俟揭曉後寄嵩佺已  
歸去不並求代致闔運還山暫得消息恐後有相尋者  
仍須出游以避之久慕嵩華思一游眺夏秋間或西北  
行耳專此奉問敬頌台安

復吳同知

邈邁清揚未申款曲荆沙發軫涕漑聞驚幸得遄歸實

深危悚前得來信重荷寵存作復稽遲亮昭欽企秋清  
木落峽口多奇山水銜知琴尊多逸幸甚幸甚闔運暫  
游幾困閉戶息心一事無成五嶽遼遠唯有老懶以作  
優游羣公居得爲之地一籌莫展想登廣武以憶蘇門  
高興所期願以時示

致劉制臺

峴莊先生侍郎節下伏處湘瀕聞高名舊矣榮晦異趣  
末由相逢今秋在江淮滌丈盛言節下之美以謂不可  
不見至南昌霞軒亦云然然闔運客游九州寡於介紹  
轅門尊嚴恐適傷賢侯下士之名故不敢徑詣也鏡海

深蒙知賞亦言不可輕干空懷慕仰失之夾轂甚歎甚  
歉方今時政因循兵氣未靖士女游惰侈靡日增吾鄉  
伏莽尤多江漢殆無復綱紀聞有能政如節下者雖在  
山海猶思自結況異苔同岑交榆映社者乎他日緣會  
終當抵掌華軒先此道意以代踵門想宏遠攬恕其率  
爾敬頌台安不具

正月十日奉惠書並賜銀五十循誦祇領竊尋碩論彌  
深欣仰度領人士傳頌威仁互市賈胡無復驕肆蓋由  
內政之先理故覺游刃之有餘益知張皇夷務卽不知  
治本安得入贊密勿爲國宣威俾當代識有轉機乎又

聞兼筦稅司使金如粟脂膏不潤溥利無疆吏士歡顏  
單寒有賴縣蠻歌其教載衿佩喜於嗣音德化和平嘉  
徽有子明公公勤積累早應鍾延而必待海嶠之謳歌  
乃適孚斯干之頌祝此可見天之施福亦待時以成美  
談也凡在鄉閭無不欣喜闔運衡陽充隱山潦爲災移  
家省城已無故宅買山難俟卜宅城中雖得三椽仍謀  
田舍軍志近始剗稿大約冬杪可成其意不在表戰功  
而在敍治亂得失之所由節下鴻籌所及雖未施行者  
不妨相示非欲聞斬級禽渠之功也瀏陽任雨田編修  
溫飭佃僮尤敦內行告歸侍養家計頗艱王巡撫僅能

歲致百金此外如釐局鹺綱又非所樂早年南海爲陸  
賈輕齎近則蟻慕屬來無復綱紀因聞新政整飭流品  
分明義之十萬之歲延賞人船之贈古有其例亦視其  
人銜玉誠難薦士爲上用特介之左右節下其能修雍  
乾之故事邪專肅通臆敬達謝忱

奉別經年側聞敷政每與陳俊臣歎息以爲今多暮氣  
如得明公同志一二人砥柱方州其功更在戡亂之右  
竊喜精力彌滿福壽無涯江介重游歸仁有日方期之  
十年後耳聞運烝陽重寓居然老宿此邦人士新築江  
樓俾攜小兒女孫輩同居藉作休佚之地旣感其意誼

當復少畱自計生平無少欠缺惟少更世難多識英奇  
事變時移公卿方以軍功爲虛誕有宿將老兵說士劒  
客或及身漂泊或身後荒寒說項旣不見憐分米又無  
其力近歲海關鹽局皆勢要請託錦上添花二紀二間  
未嘗染指恭逢明公大澄斯路通飭查覈想已洞照夫  
尤食者旣在所裁則廉退者宜蒙獎厲值公道章明之  
日有披雲自訴之途敢將應子矜恤者開單呈覽伏乞  
指攜總辦一一量材武安除吏盡漢武乃得除吏此亦  
漢學之淵源湘州之佳話也此外有二武人一係閩運  
堂弟曾從武愼公卅年晚得雲南武定參將從武愼復

歸乃樸山之舊部劉武壯之本管官也耳聾家貧安靜  
自守晨夕耕作不免饑寒其一蘇文藻乃駱文忠親兵  
人甚明白謹慎粗堪驅策今遣叩謁伏冀垂念舊勛恤  
其儲胥於營局中任賞一差俾終溫飽斯皆田子方之  
所以報文侯非閩運一身之事也雅道久微古風不復  
左李猶難語此他賢益復可知非遇闕規末由披寫仰  
鑒與否誠不敢知韓退之所云試一鳴號耳又閩運外  
甥曾紀元略涉多通人甚懶散一衿窮困亦屢爲海上  
之游如幕府需人似可備數並去年所薦胡子夷均几  
案之材也湘中近歲章句詞章之士竇勝往時而楨榦

之材蓋寡閩運與後秀諸生講求堅苦均無能信從者此則謀生路闕進取途多世極繇華斯人趨自困非復繇薄所能挽回而明公居高位握重權但可推波而送舟不能反奢而示儉此又時局之所由成風氣之莫能轉者矣因感摠情伏惟鑒照不具

甲午以後遂不通書以公責重任大閩運湘潭話多未宜瀆也春雨閉門忽有軍將來見出武陵劉采九先生書言周鎮習熟戎行薦與兪中丞而不用謀所以位置之閩運因告以偃武修和舊事莫提之義疑信參半以爲託詞也客去思之方今王中堂張制臺不喜湘軍可

矣若闖運志湘軍者也竊聞田子方之語越句踐之事  
親見其大將軍告身不博一醉亦爲寒心方今能收恤  
舊將者明公一人而已江南地大物博一頤指收此一  
人不難再來再收視其無用而決斥之殊不必如聶仲  
芳未及下車而驅逐同鄉用是不揣冒昧依昔年薦鹽  
局之例再奉書以干執事亦藉以達姓名於左右知自  
疏之無他或冀勤政之餘發一軒渠等諸敬新磨羅衣  
輕之流斯野人之獻芹矣專頌福安不具

復劉山長

采九仁兄先生同年道席瀕行一面託爲前緣驚艷開

齋莫能喻也周將來又奉手簡重有所託怪其諄諄不似四兩入行之例方今天子重和羣臣諱武昔之良將皆願與九夷執鞭我輩老儒尙何沾漑來書雖不得已母乃非佚老之道乎旣蒙推愛謹卽破例與書劉太保併封呈覽視其有益與否抑臣更有請者似此等武官湖南以萬計天下以巨萬計一人有慶兆民賴之公固擠破門我亦寫脫手欲其不來除非不行祝其不行而又爲寫信亦是左邱明之所恥如此在我恨兄兄復誰恨又不得不歸咎於老滌也兄幸以翰林改官文武不相統轄何故而生此事耶若弟之聲名狼藉樹大招風

自愧無能不作督撫逆來順受唯唯聽命而已想久不  
聞城南童言書此代面

致爽道臺

邵南仁兄世先生侍者去歲得沙頭手書拳摯之情悲  
憤之意循誦感歎幸承尊公起居相與欣慰和議敷衍  
當可還京令弟已移官否久不看朝報一年事尙未知  
也衡前手書來乃知筦籥江漢以蕭散之襟懷值飄零  
之身世惟藉差遣日殊非所望時事已無可言老遜山  
中未知免否題襟載酒其樂難追惟不向賈胡磨牙差  
爲健耳衡陽馬生名士之子以貧世其家流落武昌爲

覓菴館未收十斛麥遂已娶婦坐此困累失業無歸白  
端局面久定想無隙處或有數金司事閒散筆札俾得  
餬口亦雅度所樂聞也因彼求書遂得通問今年復還  
蒸上頑癡如故秋清桂香伏惟調適不具

致孔編修葉吏部

搢階  
煥彬

仁兄侍者心田再集新學遂灾狀頭喪元李師入

獄吁可駭也然不揣其本而淫刑以逞人知懼矣其能  
久乎繼持省城惟在居者祭酒滇道一光一黯皆非蘭  
亭所敬暗中補助其在兩君凡與官語切須簡要與官  
往來最忌往見聞近又延至周俞意在大捐此則又可

不與要之城中多岐而皆喜自結湖南專跋扈之名世  
年矣有一澹臺乎盡陽鱗耳以逢迎爲跋扈乃湘吏推  
委之詞非實事也熊庶常聞又被指名其父甚懼罪不  
相及乃周典也父爲子避又孔經也彼來問計吾無以  
策之今就兩君而謀焉也知已來謁否總之陳撫臺害  
人未必非湘人之過熊也言開大學堂張王有力焉淡  
言微中而怨愈深方今曠蕩之時各宜釋怨不宜攻擊  
祭酒已無成心牽連老熊是何人也望進而解之專此  
條程敬頌秋祺不具

致胡大令

箋啟六

翔清仁兄大人台席秋初在省適從者已旋衡館相去  
一日無緣復覲聞榮任有時不出季冬從容陪宴未卜  
何方遙企清塵以爲悵憶前委作神誥謹以擬成茲遣  
族子代偉齋呈鑒定此子舊習書算頗稱善賈時事艱  
窘失業多年欲改從局差弟未便爲之干乞貴局雖人  
員濟濟尙係大夏可依如畱派錢房當能勤幹或司事  
有缺由台端稟委尤爲感荷潤筆一差本督撫舊例仁  
兄指顧超遷敢先以爲賀如萬難位置或於衡府商店  
先覓羈棲以待揆補總期無空返耳專此敬頌冬祺並  
叩邱福不具

致譚大令

震青仁兄大人閣下前得手檄尙未奉復緣子獻約過後遂不來也臘煖春回伏惟侍奉萬福政紀旁施爲頌此間自琴從去後無日不思蓬公尤甚於部民知公佐敷之效也閩運明正遣嫁弟九女二月當往河南觀場一了家國之恨京城不可去可去亦不去矣小兒被舉特科亦令其往試不從政以今政無可爲也尊公頤養益勝但小縣未必供甘旨方愧無以助養乃承嘉貺益以不安明日送竈家人均作饅餌來使促發輒書兩紙息慰可笑伏維安鑒兼叩年喜不具

致劉大令

鏡清仁兄明府閣下去歲賢子送到手教具承存問頃  
讀來諭猥蒙賜壽嘉詞駱驛慰獎勤拳敬謝敬謝量移  
借重皆采循聲爲缺擇人上游專政局外無從置喙致  
負遠期方伯故人之子義當規以廉公若及私情是自  
亡友前曾薦賢譚許以兩公皆不能無私假私濟公尙  
無傷雅今茲調劑非彼徇情有負垂青方深愧赤隆儀  
二百何所取焉謹以原封退還來手賢子及王生所畱  
聯幅暇已塗鴉附伴荒函希爲轉付順頌台安不具

菽咳仁兄先生道席昨使來適有稀客未能作答來札  
甚謙意甚厚惜引喻失議耳豚肩之賜以擬換羊書蘇  
黃年輩略相當奈何欲拜門乎菱莧秋蔬比韭花之佐  
肥於恨拙筆不及楊少師然皆詩料也弟詩不苟作酬  
方家尤難興到會有報與壽酒皆遵命展至九十月唐  
侯當不作裕公也廿四日有郡館之要會當相見日內  
童僕盡出竟不能出游此簡命船夫走走送用違其才亦  
當賦舟人之子耶

送炭船來奉事教洋洋乎洋洋焉知王介甫之非以去  
要君爲鬼怪輩害事也功成身退自然之道龜山蔽之

斧柯奈何午後兵備來談言及唐劉佩服之誠方以不  
得大用爲恨公論自在私意將不得申闔運亦隨風轉  
舵又附于在升言升之例知去就理多端也且如公去  
則明年送炭又靠何人然則爲國求賢公私兩利孰若  
附和一人徒增林下一詩酒朋乎恐公以買炭虧空爲  
名輒送卅六元交五世兄以清前款黃色人不肯杜後  
患糧課又來日內正與聖賢相對此百五十石消得著  
也涼秋始還其期甚遙張制軍有巡江之議進退維谷  
竊恐公亦拜巡升之命則奪我鳳池而仍棲枳棘又洋  
人所不料耳專復申謝卽頌近福不具

致張孝廉

雨珊仁兄先生台席再謫衡陽又覩綠火幸託清吉坐  
賞高秋每念城游且欣且懼側聞經畫克饜羣心但免  
訪聞卽不雅正幸甚幸甚衡州舊有長郡會館兄想亦  
早知因地太偏仄多方恢拓財力不給久議無成今生  
意稍興客游稱盛始發捐簿廣募集貲大要仿古什一  
之法量力飲助弟亦書捐五十元則他可知矣貴和豐  
公司分在衡州者獨爲興旺每歲可出入二萬金以外  
例捐二百金主者以老總爲詞必須請示能游五侯門  
者獨有闖運特此呈送捐簿務乞書捐二百金發交分

店功德無量所有好處弟序啟已詳無庸贅敘也專此  
恭頌近安不具

致馬生

用度浩繁專靠出賣風雲雷雨一信百金久出筆單而  
令叔以瘦鴨換之故爲難也既承居間今送上爽書一  
留兼示其意後帳免言不誤主顧亦吾賢所宜知也

致夏觀察

子新先生大公祖節下奉別後旋聞榮命未及箋賀亦  
以解館在卽擬親詣轅在苒旬時遂至歲暮伏想釋煩  
居簡綏福迎春新使方畏人言或仍借使君爲重耳

運往歲必還省度歲今以敝鄉新起樹藝局暫畱照料  
不獲入府同縣萬生前因余太華轉求帡幪屢諾轉啟  
見時或又忘之萬生朝夕難支閩運因循歲月檢點年  
債此亦大端用是特介一函俾其面叩尙冀假之盈尺  
以恤孤寒專此仰干並賀歲喜

朱明盛長方歌南鎮之功青使宣傳復備東階之賜捧  
瓊增重結軫增懷敬諗子新先生大公祖靜肅民譎核  
閩國政撫孫盧如赤子益智無涯贊湘郢之謨辰揚仁  
更遠企瞻帝日定協凱風閩運招屈有心和陶空作樓  
船望海敢言競渡之能角黍登盤竊慕含飴之樂徒牽

冗俗未遂樞趨輒附來鴻聊隨賀燕敬頌午祺並申謝  
悃

去臘承賜年費禮當恭繳因戒行在卽恐勞諭畱祇領  
不辭祇深愧荷新春事定百度咸宜重惠來章藉諭多  
福闔運濫設舉比倏逾十載正當歸老適遇責臨方幸  
賓主之歡重續棣華之好緣三女皆已長成方當議昏  
久客衡陽便成耽閣兼年已七十精力不支乞假還山  
事非得已講席已薦代者首士想必啟聞月課甄別例  
係專主課卷甚少一目了然如其擬題敝門徒程戟傳  
陳完夫均可代擬謹先繳關帖以免懸待餘俟續上

此奉復敬頌台安不宣

復陳觀察

復心姻世八弟無恙頻聞言去實亦望歸官本遽廬時  
多荆棘暫作狡獪無損本真浮沈候補之廳日聞差缺  
之說暗隨俗轉習與性成又不若珥筆木天自稱侍從  
猶得半日間也張幼樵所至句畱遂淪牛相由傍觀之  
竟何益矣楊世兄多儀見餉具已拜登唯四百朱提不  
合文例向來朋交銘志不受筆金楊銀想已送交匯票  
不便取用乞卽方便撥還彥規俟得便時再交由匯票  
則不必也彼此皆無急需終於反璧而已何必亟亟乎

兩弟皆到書院暫居均能將就闖運今年當遣嫁兩女  
暫不出游端公質美未學恐尙不如張也行旌近在何  
處念念

鄂游來往惟恃北道主人既勞從者又損彩票得半月  
款敍亦已足矣羣道縱橫各有所主出言尙須謹斂恐  
人描畫也劉君舅無苦差可當伺便或有優差龔文生  
則須苦而兼優苦有出頭優無枵腹遇有相當或兼或  
本皆可以鄙情達之要津專主之政但不可自己出耳  
四哥到後十二便可送妹還家此實便事兄弟姊妹多  
又各從宦易成路人不可不傷也傷如之何不客氣而

已歸還到家後卽日南上每行損己損人頗悔輕出然不能已也俟嫁女後便當扁舟江湖不復上岸矣功兒本欲坐送船至鄂緣官舫遲留將俟月初乃來疆臣又紛紛調動湘省亦大有更改尙不知孰勝負也

### 復楊道臺

彥規仁世大兄觀察台席曾隸門闈未陪尊俎側聞宦迹無忝先箴方覲時艱願隆楨幹先公豐功碩德久應鼎銘昨讀行狀實窺原本略舉大德愧不精微乃蒙廣敬甄文謙詞重幣庭實旅百金次見情觀禮知仁孝思維永敢不祇承遠貺昭示朋交惟闔運舊例凡託在知

好卽不受金桂陽中丞是其前比已令復心世兄轉寄  
尊處非敢辭億受萬聊以重禮輕財想荷照知彌殷敦  
謝台旌許祗白下時局必有更張能便還湘亦云良計  
專肅復謝敬頌台安

致李巡撫

仲山侍郎大公祖節下長沙上謁祇以門義過從未爲  
傾服也昨聞三奏請對遂絀吏議相去遼遠未知許謨  
欲陳者何要以舉世汶汶之時獨醒獨清江湖魏闕孤  
忠萬里鬱結憤發斯誠烈士之偉度朝陽之鳴鳳矣富  
貴浮雲時來得意必有超世之量乃抱孤憤之懷使他

日史臣猶得歎息想慕日某也一疏某也一策則千秋  
之業何必臧洪遙企清塵曷勝景仰近日行抵何處作  
何歸宿雖非所措意亦願謀長因感橫流特書奉贊敬  
頌台福

致陳兵部

小石仁兄姻大人史席去歲先秋渡海本約仍還入都  
故未告別人事牽綴忽又一年秋初戒行又爲衡人牽  
綴堅約明年講學一歲乃許告休致事之難不獨在官  
者有經手未完也江文通詩云送君如昨日每念天銜  
元旦錦城絲管未及一彈指頃況去歲消息之相問乎

循覽來章情餘於紙殷勤下問尤見宏規黔中正旺功名必遠庶幾文誠之好善而加以精明則曾胡不足多矣八郎求師自以孫伯璵爲最宜彼能禁約家人文理其末也世家子弟幸有蔭藉何必役役於場屋舉業惟近正則自有長進孤居沛南不如旅食京華前切言之而不見聽仍望念舊篤姻爲謀長計卽得與仁兄同居尤佳觀察未深思似又避嫌閩運未敢干豫以爲負負來示云欲出似亦過慮若時勢不久積金買田豈能安居如有十年廿年可安郎畧一麾居然實任考差內轉富貴多門汲汲目前殊爲蚤計令人鼠目見二李軍功

則思投筆見七耶指使又願學洋誠讀史書始知如張  
翁紅人自古多有其才具遭際同而升沈頓異者又不  
可數焉見我之必得耶孔子知富不可求乃樂疏水所  
謂君子去仁惡乎成名者爲學人說耳求之彼無可憑  
求之我有可據聖人非教人蔽榮根也天資廣博當味  
斯言闔運從來不爲高論世人自躁擾而已承示索詩  
比有錢店兒已刊行二本容卽寄上來篇亦當細讀加  
評奉繳闔運今年多半鄉居以早年發願點畢廿四史  
各爲數語係每篇之後以備遺忘資談柄尙有元明史  
贊未畢城中客多一日點一本便覺爲難稍一壓積無

箋啟六

能補足故於山莊閉戶了之今已完工矣明歲六十期於佚息不復作學生日課也家中幸託福芑尙無啾唧親丁十六口分半城鄉歲時聚會惟奢僭之習尙未能改然比之少荃香濤又爲靜儉在城早起秋涼晴爽輒作二紙奉問起居并設弧之喜

前聞峻擢甚喜旣又念受任危難游於羿殼六轡不驚懼有隱忍以求合者富貴浮雲偶然事耳立身當自有本末平日討論籌之熟矣未敢以世俗所榮爲賢者賀也成都之詩尙憶之否喜青雲之果致恐知己之傷明誠私心所惓惓而不容無言者清淮奧區總漕閑地假

以歲月可優游矣。慎五亦尙不忝康侯。則無長進。今欲借一廛而投之多虞之地。弟不便措言。如彼來相商。幸有以教之。近年移住山莊。小有營築。差足容却。不問時事。族子代縉。老客江淮。弟欲令其謀一丞簿。免於跋涉。借援樾蔭。未識能否。差委特令面叩。恭頌任喜。

致李制臺

勉林仁兄先生。道席津沽。半歲日接清塵。卅載交期。因茲彌篤。還程滯促。皆累蓬心。未得專函。時見邸報。知近履益康。有署攝補官之望。非復江南萍梗矣。貴縣大盛。已兩翰一撫。尙有一暗學。差乘時而興。獨無船政之意。

耶甚企甚念閩運至吳略辦嫁裝到家歲盡幸做縣送  
潤筆半千藉了去年今正入山誅茅剡土爲消夏之計  
而工費繇重失於量出遂至觸藩所喜諸女提攜並無  
疾苦老妻久病尙延喘息假我一年或者翩翻訪剛雪  
公壯老俱逝同袍落落唯餘俊臣筠仙矣聶陳坐得美  
除使人健羨旣念兩君又爲君慰也要之事皆隨緣不  
由人計其有不能不計者則亦緣會使之四十年飽閱  
升沈此心古井杜詩云願惟螻蟻輩但自求其穴及至  
棲皇蜀中不如螻蟻所自許稷契者安在假使當年無  
求穴之心仍然稷契自許果園雞柵差足供給豈不墜

今壯氣哉每一思之傲然自得伏居奔走同於應世非  
日君之失而我之得也六女已於前月嫁訖黃家號稱  
百萬諸子分產各可數萬耳指日窮矣近惟席研香十  
子各得廿四萬金爲湘之冠然無名坐銷亦復何豪文  
卿尙云難支毅齋亦復苦貧湘人局勢不振如此因暇  
寄間起居無任馳想

去年旌旆過衡灑掃奉待以爲必維舟一夜藉話離悰  
乃順水風乘流檣於洲下比時欲一過訪而念厚祿故  
人之詠遂以自疑文孫昨來首探敝舍旣已相見致命  
見存七十之辰兼金拜賜拳拳之意朋好相誇皆謂前

歲之疑淺之乎相測也然士貴自守交在知心兩者雖妨各行其是知我者當不見責耳美政流聞似云太刻方今泥沙浪擲不在聚斂以填巨壑培養民氣整飭舊章一士之賢足當一國區區效法疆富適足自傾昔李今張皆成誤國時事大壞名亦隨之死諡爲忠生而何益此所望於遠猶辰告或冀醒迷雖不與樞機儼然藩鎮桓文可學靡裕成功羈旅逋逃猶稱盛霸何倭俄之足羨乎久不對談聊資拊掌庶幾言之無罪耶文孫開闊誠謹足徵祖訓他日瑚璉少荃所云晚福無涯者此最足慶也小兒皆守筆硯各有一子繞膝四孫差足

娛十女世佳嫁其八俟兩女婚畢便可恣意遨遊不能效  
向平五嶽當如少伯五湖耳拙著均爲門弟子刊本印  
出俟到鄉檢上奉政城內恩宥書不盡言敬頌年祺  
前因賢孫上箋亮已入鑿整軍肅紀具仰風規移鎮海  
疆卽將授鉞但嶺海剌敝又甚江州近年制撫惟合肥  
稍勝然開賭籌餉仍襲張餘振而被之殆未易也國不  
患貧久成腐語誠近世人心之害矣閩運出游逢亂遂  
不成行仍還衡陽且待明歲前有幕子鄔生以鹽吏分  
粵卽欲附啟恩恩未暇茲以廖大令赴轅聽鼓特上一  
函廖君開敏老成衆所推許試與差委或助敷賁鄔子

乃弟葭孳當已上謁未識蒙省錄否粵吏如毛爬剔不  
易然可用者固大府之所求耳非欲說情邀恩也人便  
再得相聞敬頌台福不具

與張學臺

子虞先生督學節下去歲恭送使星未展傾敬太夫人  
慈壽牋賀稽遲想荷仁昭恕以方外伏秋校試冰鏡無  
疲幸甚幸甚閩運湘瀕邵埽竊承風教雖慚老馬願附  
膺龍大比之期知許登進有清泉學生廖曷文好學深  
思能通公羊禮記在館三年試必高等前蒙首拔以文  
場未得冠軍如荷調入校經俾升上舍漸摩風氣可冀

接步瀛洲用敢賤達以副宏獎之懷閩運比因家務臺  
綴未能上省文昌新曜甄拔飛騰遙望月暉惟有企羨  
專肅奉問侍福不具

與席道臺

敝處與胡文忠家歲由貴局支送六百金乃張督部優  
賢報功念舊右文之雅非乾館也被以爲賢而餽之我  
利其惠而私之則不賢矣是使督部濫惠而受者無名  
故必辭也潤公雖亡人知其心必不欲其家受此虛惠  
其子孫不能辭故代之辭潤公意也如是乾館則必求  
而得或薦而得萬無僞辭之理而易世兄不知大義妄

列於表以蔽張公之美而彰朔王之陋蓋其魂東魂西  
魂不附體之所爲不足責也又隨大例減去兩月則更  
謬矣減去兩月何不裁此二分且不必裁而固已一辭  
再辭又何勞易公之歲省區區乎代者不知其由但依  
易例弟又遠在山谷從不入城故瞢然至今也幸逢閣  
下明達無私故敢布其誠心去歲小兒所領悉令繳上  
今年年終報冊求向名下注一辭謝未受明年不再列  
表以免剛中堂之流查帳追繳諸多未便

致曹禹州

東瀛仁兄侍者七月得手書並淇縣圖敬聞治狀兼金

二百以益盤餐厚意拳拳祇荷無已前屢承寄貺以爲  
出京後無復嘉羞矣不圖鶴俸又遠分也然銀子不如  
杏仁木瓜瓊瑤詩有輕重相念不在多儀也幣美傷德  
願以爲意聞河南會試猶欲一行昨聞豫撫告勞  
將移江介則夷場相接近不可櫻七十之年不能屈辱  
不獨白帖無分且不能爲君後進也山居營築足容兒  
孫行將扁舟沅湘載東施以招屈子耳旣未聞近所行  
泚此書仍由軍機轉遞行程展轉到當歲暮瞻望河淇  
眷想舊游蜀顏伯琴亦吾故人見希道意卽頌冬福不  
具

與曾公孫

震伯世仁弟侍福奔問徒勞飄流遂久聞東干袁凱亦  
復無成當世貴人聞風相避誠宜閉門養望收復聲名  
子建自試之文竟何益矣昨後山農人來言南州開田  
分爲四股君得其一求爲莊頭有是哉又將與渝撫爲  
緣乎墾田雖本業志大心勞詩人所戒也山農吳祥發  
往在水軍以其貌似郭武壯故加拔用令領一哨今還  
力田亦尙是焦大包勇一流欲從驅遣故令一見亦藉  
以通問並探消息聞又將還桂聽號房之命似又不如  
家居侍親但不與有司爲緣則外議息矣才具門地皆

第一流待時自效必蒙眾許此數年中誠未可出也貴人但當鎮物宜以王瞿爲法然稍靜澹所求必獲老氏欲取姑與之法想荷深照遲得相聞不宣

致張瞿軍機

楚秋仁

于致世兄台席別未永久事遂泯勢當束手之時居具

瞻之地未敢爲崇高慶也舉朝皆在綱罝中而猶欲言政治誠非野人之所喻矣上既苟延下遂苟仕又所謂打渾水捉魚者耶陳儁公叔子兆奎字完夫年少好學相從十年經史詞章皆有體段因去歲停捐入貲赴部既其兄命亦當一上曹司人海未宜溷之欲應特科以

定行止兩君既皆世好又當物色新進之時如此人材亦不多得因令修禮門下尙乞進而教之闔運尙有二女未婚俟畢當汎舟沅湘作浮舟屈子身世粗了幸不潑湯以此傲曾左耳論時事與羣賢大異如欲聞新論陳生口具京華諸舊識當已寥寥一片冰心未敢多愧老嬾省事未別具牋祇頌邸安不具

致陳藩臺

六笙先生大公祖節下秋半上衡正值過縣鳴鏡江響挂帆風利瞻望弗及離情眷然比作小詩補酬東洲之作恩恩未寄旋奉來章篤念之情益形疏簡值闔運解

館久稽還答尤爲荒略也伏承遠謀未雨近慶安瀾鄰  
警聞威知復弭帖珂鄉仍有兵事思往日團練者不可  
得黃植庭又一鄭夢白也雖有彈章正無奈何幸得安  
居從容度歲公子在近亦當來否眷屬團圓甚慶甚慶  
闔運還山陔伏并不入城時事可驚游情頓減明歲仍  
還故館俟時局定後再議東行便道奉謁耳闔運表弟  
蔡溶春幼孤情農唯貪坐食前充衡麓局巡丁有年因  
屢調疲奔欲移岳澧肥缺伏思大公祖經營關樞可役  
多人遲則後時特令先叩或暫於岳澧麓局令得噉飯  
數月以待開關雖瑣瀆妄干事實切已但指揮可定不

費吹噓仁覆爲懷未遺微賤區區之求必荷照察省欽  
兄未及別候尙希致聲專復叩安敬賀歲福

六翁先生大公祖節下去冬至長沙度歲頻詣公館探  
候起居奉到手書慰問殷勤情詞周至彌增跂慕藉諭  
康強旋聞移節華陽正謀入蜀計日瞻對致未復書夏  
秋因事至衡復問蜀警爭傳偉績迭荷恩褒補卅年前  
勇號之遺蹟卅年來應升之品且知凶徒闖入禦寇門  
庭壯哉是翁奎員咋舌於此乃知知兵之效也老客聞  
之增長氣勢望青城浮一巨觥甚快甚快闔運因弟九  
女許嫁衡陽復來暫住船山一席曠館兩年廉頗思趙

人待開府兩川無忘相約勿效晉行之不待也。倦屬已  
安。抵成都未省城信難真。竟未知也。學堂萬不能行。非  
無師之難。無弟子之難。張楚秋管學而首議不改。船山  
則又非無弟子。正無管學。公聞之。定掀髯耳。

致朱兵備

曼伯先生兵備節下。申陽過客。再接清塵。適館授餐。情  
文周至。北轅阻雨。南土思歸。車殆馬煩。未能上謁。企瞻  
鈴閣。但有欽遲。會合有時。行當更覲。春禮多福。頌幸無  
涯。舍親陳杏生。近得依仁。又叨世末。近聞電局委員。可  
以更換吳仲樸侍郎。與公至契。信陽實隸。提封欲求。特

予吹噓謀所以位置俾資餬口冀積薪資使窮老諸生  
得成歸計恤忠念舊固高誼所優既有懷輒敢私布  
如非杏生本意向望開導使早得還鄉似勝於依人作  
計耳專肅申謝敬頌道安不具

致但糧儲

少村先生大公祖節下今年恭逢正慶擬詣公堂介壽  
賀春藉舒誠戀人事匆促未及修箋適拜賜書倍承眷  
獎獲觀石刻足副遺徽叔鴻近學翁劉無假魏習氣惜  
拙文未及六朝耳聞運初約五中前泛舟下湘會得大  
雪自除日至初二夜淅淅未止逆風淺水懼阻昭灘謹

遣使奉書輕齋急進並去年一聯無之容二月間補上  
並送廩公也鄉中無人照料婦女輩又復來衡亦俟春  
水生時同還山莊耳專此奉復敬叩壽喜並頌春福不  
具

少村先生大公祖節下前在省宅避干謁之名致未走  
詣將俟秋闈奉謁又值監闈遙企光風曷勝欽遲校經  
課卷久未寓目廩公見委實亦欣然及閱撫課無卷可  
取黃茅白葦迥非早年諸生不以讀書爲事誠可憤惋  
比卽致書辭館兼請停課次公置之不理兩司竟未之  
聞又與書家中諭以退銀繳卷頃讀來示亦陽爲不知

箋啟六

三百五十八人苦我甚矣。下交五十載，義不敢原封。璧  
回，又依撫例，悉心評點，封呈鑒定，分爲四等，取錄上三  
等，遂僭定名次，用省清裁，其不取兩封及備取一封亦  
略有次第，但未填寫等之自鄙。公若憐我，乞告知顏朱  
後，勿再施號稱，辭差而當，差如故，亦公恥也。今夏幸不  
甚熱，入秋更涼，伏維珍重。閩運將於秋節前暫還山居，  
期於麓山登高，以候清塵，肅復敬安，無任馳想。

致俞巡撫

虞軒侍郎使公節下，長兒來言薦牘下，及小儒不期豚  
犬之才，得與龍門之品，方慚失教，更獎傳經，仰承慎重。

之至公已復昕宵而自勵修箋待上新詔旋聞移鎮太  
原爰綬左輔臨汾三唱慰公還晉之心負杖重觀感此  
傷離之意想須和煦候送旌麾謹遣鄉備參承福履三  
元瑞雪歌郁黍而占豐四郡黎民冀名棠之暫憇闔運  
尤蒙深眷倍益遙忱肅頌春祺並申謝悃

正月初卽上箋遣長兒齋呈材官來奉賜書閱三日又  
由驛遞到手教欽遲欣領誠悚誠感公之惠澤在湘非  
獨被山民也而尤拳拳於物外之一人則襟期所寄必  
有殊於世俗者出處之際何待贊詞方今時賢誤於輕  
率其鎮靜者又流入模稜一流淡泊安靜非公誰任日

疾得閒自愈愈則當起滄海橫流處處不安蘭亭豈永和時耶暫時雍容一從漁釣仍宜訪求異士俾代煩劇他日總其大者可矣與其求之吏民不若求之舊友和局必不能久任事能有幾人公殆有訪子陵雲卿意耶吉行不須候羸珂鄉老叟之錢長沙亦應有也仲春初卽當詣謁昨已憑唐衡州傳語矣趙冊遵命題名藉使奉上送行文已起草因字畫太率俟錄正本再呈鈞鑒送行詩則未遑作作成時卽題寄冊一並齋呈日內遣嫁弟九女須初一婿迎去乃得擺脫畱使四日恐訝稽遲自城還齋夜書四紙莫盡瞻依答謝之意恭叩道安

先賀榮喜

虞軒先生使公道席城陵磯前逢來舫比俱欲停船適  
兩輪相切至近頃刻皆過瞻望歸旌唯有歎羨旋聞就  
養夏口復擬通候適裕蓉屏來湘面詢起居寄聲叩安  
塵思塞胸頗憚修箋日復一日乃荷手問懇懇拳拳不  
遺野僻知明公閒健精神充周甚愧甚喜承示游蹤如  
陪杖履桓樓梅隴先後相聞釣石猶溫清尊未竭近復  
思還京口眺賞金焦高興遠懷定增詩畫但風颺所及  
聲息惱人未若山陰餽香酒熟謂宜扁舟湖上先探林  
梅仍泛雪谿暫歸戴宅闔運將薄游滕閣洗馬灌池臘

節還山再詢動定湘中漸復囂競咸思鎮靜之功幸歲  
稔民安聊可卒歲專肅奉謝敬頌福綏無任馳想

致趙巡撫

次山先生使公節下還湘未敢上謁四月二日出西門  
道逢軒車飛蓋雨中前騶簡少心目爲之開朗知賢者  
固不同也卽此風聲官士傾動因而施政必有移風易  
俗之能自六十年來無此明君良牧矣五月朔奉手教  
具承綏福發到課卷加之獎借披覽終讀悚懼恐惶身  
無田子方之名而被魏文侯之禮謙稱下逮交誼遂疏  
不審何由屏之門外闔運與節下年輩相接氣味略同

晚之號何由而生教之稱以例而及固當引分自遠不  
附苔岑將俟收回乃後安帖耳校經課士與自吳公將  
及百年名臣舊學並循得此路闡運以生童而躋校閱  
亦既卅年人競研經言皆有物自甲午以後士皆鶩於  
進身稍知名字爭趨局館唯不通童生及外縣村儒一  
人數卷妄希官獎今發來六百餘卷遂無一通人不意  
退步之速至於如此謹爲批抹以待鑒裁此後可停止  
月課以示甄別亦令有志之士知所奮興事有改弦此  
其一也如方伯列位必循舊例則襄校一席請付他人  
闡運必不能以有用之時光疲於無益之評點輒呈所

見伏候參詳如不責其妄言幸轉告之僚部新晴驟熱  
惟安和珍衛不具

承詢停止書院改立學制救敝正俗莫急於此竊以爲  
國家學政本有專官上失其職咎不在下今之改學則  
務在糜費官款無出專恃民貲以有事之秋與不急之  
務并心外國專聘倭師就一學論之堂舍器具費至萬  
金教習監督薪水數千購置書器錢亦千萬一縣物力  
必不能供常德奪產殺僧郴州遂至民變湘潭蓋歸侵  
蝕寧鄉徒事鋪張以此開宗何能造士且漢儒稱盛良  
史譏爲利祿之塗宋學廣開先儒尤憾科舉之士儒爲

國蠹有由然也今須先明廉恥分別士民次整儒官以  
修專職謹擬學規聊備贅說人存政舉則在明公  
致譚兵備

芝公仁兄先生兵備節下臨別殷勤荷承重饒儀文稠  
疊感愧交并一月馳驅幸已卒歲閉門臥雪眷戀清光  
遙想戟門新成大夏師範之館當亦興工朱守傾心唐  
翁助喜樂可知也跛子望之閩運專館已辭餘緒未已  
明年允再一往期以春深船山一席遠難兼領又閩運  
少時見何煖叟動兼講席曾面進諫詞不宜老而效尤  
貧得微祿謹卽奉璧大聘附繳四金丁叟處未月致函

希爲代致北事大約啗喝以糜費國財南道主人力小  
任重竝健者之不如是可慨耳附呈近作數首南豐橋  
一簣聊爲歲饋敬頌府中金福順賀年喜不具

致裴通判

裴大世兄執事前得光祿公赴狀時正值東游過淮安  
迎女攜有姪屬未便艤輪訪弔本擬歸塗登堂乃值北  
亂怱怱恐江湘阻隔飛馳而返至今又四年矣日如駒  
隙碑志未成得讀行述及來書知己從宦服官在近是  
時又適有鄂游以爲不必作復卽當見面及昨至江夏  
詢之督撫云未在省撫臺云曾見一面似不荒唐將來

必有位置云云及還家又接手書具知在鍾祥幫審甚以爲慰七年不通信者有此委曲未嘗一日忘光祿也閩運有三宅一在省城一在湘潭西鄉一在衡州不常厥居故通信最難行述中獨不記尊字故不知字

唁龍郎

驗仙世講廬次三月聞尊公棄養追念游處不復能作哀弔之詞誠以求友九州知心無十就中最久最契者惟餘靈光二鄧同時其知我不及也尊公旣病廢閩運亦蹒跚世間固知同死然豈能忘情於响嚮乎以此言之則今之唁慰猶世故也子威來聞當門知禮稍以爲

幸爲學在通不在多在實不在名求之至淺至近乃至  
深至遠也卽以喪服論今欲制斬衰服屨笄經豈故紙  
中所能搜辦宋代諸儒近時徐秦程江等著書等身不  
能制一衰衣讀書尙何易言由此三反卽可發名成業  
家事有賢母支持自無勞念耶

與龍郎

研仙世講姻仁弟侍福去歲一書已久不省昨到城乃  
得輪撥寄書及百金之贈詳哉其言之也政聲遠聞甚  
慰宦橐所餘盡付工商雖不自利仍與往年廿學無異  
此經濟與經術分科之故吾所以不東游者惡夫益詰

非惡商船也來書所云似以風氣未開爲疑則仍陳巡撫之塵言豈曰新乎四郊多壘非士之辱幸及餘年優游卒歲婚嫁將畢行當一舟湘沅作歡喜屈原不及國家事也嫁弟九女投括殆空得來銀濟之甚副所需然不必也寄貲與我亦譬之今日言生利贏餘者不知其千千萬一擲泥沙耳何如畱此些須以濟窮困厚意長存努力自勉爲光多矣易昆甫有嗜好知吾賢已節嗜好尤所喜也適將往河南作經策便復二紙頌堂上福安餘俟邯鄲

致端兼督

自別桓樓如有所失非獨感公款至亦以擺落塵俗開  
拓心胸俗吏儒生不能拘限具此識力乃後可言設施  
間氣所鍾一見爲快想公亦照之也雖然今日疆臣供  
人指使而王瞿又無所指使規模雖闊實際難言況復  
五日京兆二品教官比之曾胡猶多不逮惟冀澄心養  
望察吏求賢毋遽遠謀以勞心力學生狂議度外置之  
無所用裁成誘掖此皆張公所自招耳范仲淹傳彼未  
嘗讀也在嘉魚奉上一詩計已達鑒官舫遲畱五日始  
至長沙無名之費斯亦一事鄂中似此者無數泥沙鎔  
銖自古然乎兩窗奉謝敬頌台福無任企仰之至

致黃藩臺

花農司使公祖節下天津通謁未接清塵星使經過徒  
瞻輶傳前以山莊之鼠竊復承冰案之鷗驅蔭樾知仁  
修竿尙簡恭維新命將涖大藩趨送仍稽捧書滋悚校  
經諸卷校閱稍遲以月前陳情撫藩謹辭不敏乃更駱  
驛遞到應接不遑欲踐前言懼違台命令亦評點呈鑒  
務乞詢之次帥及方伯曾否照察區區此後兩副使課  
卷萬不必再寄做處免致往返延滯無任感荷專頌節  
安卽代叩送

與陳郎

懷才欲試人之情也懷才得試而見用則患所以立而憂及身矣懷才而不得試則羞妒忿激不肖者至悖而思逞如康有爲之爲亦人情也楊度但以慕名之心轉而慕利暗爲梁煥奎所移而不自知前之師我者亦以名也非求益者也與夏時濟同與廖登廷異廖登廷者王代功類也思外我以立名楊夏思依我以立名名粗立則棄予如遺矣故康廖猶能自立楊夏則隨風轉移今日師日本明日即可攻日本師之而日本不得其益攻之而日本不受其損其能損益我乎彼無名利以招致人則不能有黨徒爲可笑而已不足諫也功兒計已

到京莪女亦已至邸乞轉告功令轉告莪使知我知之而已考特科應酬事也想不必得意失意惟煩寄語吾黨之懷才欲試者衣錦不可夜行名教自有樂地發財升官不可力求歸來歸來桂樹叢生兮山之幽又自有一番景象身外事不足道也五月廿三日晴窗朗涼書報完夫

完夫世弟文席前聞李甥言亦將爲榜眼所邀頃得書云定還州進退雖異容身一也貴州有尊公遺業大可爲義軍響應楊哲子之所羨豈但爲譚劉恢張而已竹

軒近頗有張法

張法卽設法春秋所謂文致

大概學胡文忠非由兒

教也屈已推賢則好善優於天下吾雖不能助之何能  
拒之所謂前言不知何指本約有急則往非欲興文去  
年已約午詒來山莊度歲竟無回報計今當束裝也還  
州想在二月此時亦可同游否攜妾從師正與後堂絲  
竹同義一洗擔簦負笈之陋劉仲長所云爲寒生吐氣  
者其功賢於開民智矣

與四子婦

二月到省知懿兒不告而去追至漢口已渡海矣此令  
兄及羅順循設計辱我不知我辱湘潭人亦辱也卽欲  
假官力電報追回以事太操切傷父子之恩又高攀貴

門而令有離絕守寡之事重貽堂上憂甘自受辱而已  
輒爲之三日不食旣而思之杏元小姐被姦臣陷害此  
事古多有之自不合生癡兒不宜怪人以此故豁然矣  
然令兄則終身不願見也瓜分之說外人無此心妄人  
借以求富貴耳彼入我京師而不能滅我比之吳三桂  
迎攝政王時一能一不能已自判然就令瓜分去無道  
而就有道有何不可孟子曰人殺而恥爲役猶弓人而  
恥爲弓我不能自立而身爲奴虜固其分也又何辱乎  
女之惑於妄言必無他心誠杞人憂天之意耳令兄身  
爲男子而區區以無業自恨欲求衣食之方則其見小

手不能縛雞而欲憂天下之亂則其膽大能言而不能  
行則其技窮倡率一家皆爲無益之憂舍家庭之樂求  
流血之苦則其志迷平嘗怪易中實魂東魂西以自欺  
欺人而於吾懿親弟子中親得之更可怪也近日事又  
大翻矣特科弟一二人皆被黜落湘綺弟子不取一人  
乃以石屏州人爲狀元雖不知詳細甚悔令功兒應試  
他日或誣以康黨未可知也語曰無過亂門過猶不敢  
況欲入乎從此又長一見識不復施庭訓矣前十餘年  
令諸女學裁縫以當就案邊授受遂輟此議裁女嫁後  
學之今女亦能縫是吾望也賞周嫗衣男工不能及何

敏妙若此獎一皮襖試能縫否見與六姐書語多幽憂  
女子之職在奉祭祀待賓客育兒女以養人爲職故坐  
食而非泰也維鵲有巢夫人起家而居有之有佐夫之  
功家國所係以存亡夫或不能獨成夫家子或不肖保  
其宗祏繼絕存亡將於是乎在今不憂王氏之衰而目  
營四海輒欲自致富厚爲旦夕之供養將令吾家皆仰  
給於女而後爲婦職何其已欲立而不立人也夷狄商  
賈之行而楊王何取焉推撫資孫之心足以爲賢孝推  
憂己無業之心不過爲市僧故擇理爲難也此後慎無  
謀食無憂國上侍賢母下撫兩雛閨門雍和有慈有威

箋啟六

池蓮院竹冰月清風時復微吟寄懷遐古此亦人生之  
至樂生民之多幸何必坐愁行歎儂焉如不終日哉山  
塘工匠需錢穀價又賤存銀粟命便可與玉傭放散六  
女等七月當歸九女在劉家甚相安一家皆驕養之以  
爲千金小姐已則自比于竈婢傭女王氏女學於此得  
效不必從龍入潭三諸蕩子游乃爲民智開通也趙撫  
佳人倭氣頗深吾亦敬而遠之信來不復以諷諫而已  
中伏弟三日書與兆仙

致夏編修

午詒姻世仁弟侍福頻得陳譚信言文從當歸頃因江

使問訊還侍節堂幸甚無恙考差不得耶抑未預考耶  
兩者皆失之矣尊公見召又承隆禮想亦趨庭之力然  
事未易言也已有詳函覽之自悉衡陽鍾生頗講肝膽  
九女婿言其可靠欲覓餬口之方彼與周敬湖相善妄  
思依附特與一函希稟知堂上指揮各局試其能否如  
或可用亦椽桷小材足備任使非盡請託也其或不中  
則於鹽局覓一小差不飢餓足矣冬間當乘標渡醴一  
謝尊公藉得相見專此恭頌文祺不具

致夏署撫

菽軒仁兄大人節下奉別又將十年時聞往報均疏賀

簡伏想因宜施政卽事多欣爲頌爲慰賢子一疏幾於  
奪官闔運因此大爲孝達所憾雖絕交已早爾彼怨方  
長然經此大創遂無公議得賢子爲鳴鳳使他日考國  
史者知當時尙有一人萬古丹青以衰年謬附不朽誤  
中之誤竊自幸也隆兵備疲老龍鐘得依樂國一切安  
置務乞加意從優旗習不知理家多屬股削闔運實愛  
莫能助不審能飭紀綱定一常額俾得量入爲出否其  
所存僅了日食若爲之開源尙不若爲之節流也到城  
憲憲餘俟續布敬頌台安不宣

菽軒仁兄先生侍郎節下前歲寄書後以賢子時有資

訊動定軌相聞知謀國涖官皆宏偉略不以封疆爲限  
誠副傾企之懷欣胡丁之得朋也在衡州微聞貴州人  
言將詢及芻蕘方深屏營八月底因趙次公相約入城  
道逢軒車疑是來使遣問果然特派大員致其脩聘展  
讀手教謙抑彌光雖文侯之於子方畱侯之訪綺季無  
以加也滄海橫流有此雅度已度越岑張矣改學之說  
闔運久欲建言曾與孝達面陳楚秋書諷又上箋俞撫  
皆不諒區區秋間湘省沸騰擬呈請奏又聞慈聖意在  
停止嫌欲尸名茲承奏允已於九月三日具呈督撫求  
爲代達並與書次公條陳建學之宜鈔稿呈覽如以爲

可自無須延師或宅安學使到時會商整飭爲善至於私情談宴江湖接連訪戴之舟無勞具楫聘金路費皆不敢承恐湘兄不肯收回俟見時再爲面繳闔運暫還船山固守本學陳復心次兒已奉左全孝指揮撤我臬比矣誠可閔笑也

致沈山人

夢谿仁兄文席周生來得手書知不必作復韓生來又惠賜樓記洋洋千言內敘肅李數言發同人之所未發循誦款惻再拜領謝知深人無淺語也年豐穀多可以釀酒亦宜因此時暇以自娛不必再勞筋骨以待大任

瞻望山阿悠然自遠閩運循例應試爲雨所阻還作一  
詩錄呈鑒粲東洲避暑萬事不關蒲枕竹牀有同陶臥  
張正陽在此說詩日有新得嘗愧小慧未儕大雅來詞  
過謙恐非苔岑舉世營營而十步之內得二芳草所樂  
同傳以繼長沮秋初或還遲君枉駕先此奉謝敬頌道  
佳

致趙師爺

晴帆仁兄大人閣下去歲從族子處得手書知前計不  
成反生枝節以爲歉仄昨由郵遞到四月一函藉知起  
居老健守貧更無人問猥承特鑒遠愬深衷愧無置驛

之能乃辱無魚之告循環三歎悚荷兼縈仁兄古道持躬可敦薄俗閻運夙無介紹一見傾襟以紱子時受良箴知當時鮮同直諫仁而不遇義所當欽是以不揣孤鳴代謀優老自恨無力口惠爲菑茲荷輒咨敢陳憤懣方今隨俗者眾知古者稀江南大吏誠多舊識然皆以虛名相假有貌無情今若挾要津一函猶當審其最要山中老朽薦一布衣投書旣未必開函延見亦徒資匿笑況閣下所彈者古調而今世所貴者時趨北轍南轅何由會合如有訪求毗佐物色驪黃虛左以迎侯生北面而師廣武尊性慎密加以撝謙又未能抵掌而談揚

眉自許則兩無所益或反敗名是以環顧四方竟難位  
置爲養老計但有漑薪此等聲氣所通吹噓立致如閭  
運等輩未敢與也然信陵孟嘗容有其人亦未敢厚誣  
當今必操衡纊因君厚望一發牢騷耳閩運不樂洋船  
聊行鐵道遇雨而返又戒浪游已於四月還衡仍理故  
業所主者船山書院非文峰也而尊函亦竟遞到適與  
新中丞筆戰羣儒十日方決又值端節債主紛來裁復  
稽遲想不爲訝紘子近在江漢歲入頗豐嗜好愈多殊  
無所益老態龍鐘爲督部所笑幸未勒休而已知念附  
聞彼想不與百姓說話矣早熱伏維尊候清和爲頌

致秦知府

子質仁世二兄參政節下夏間得手書具承存記前聞  
統軍挂管凱歸請覲或云備兵瓊島爲人所擠意雅尙  
必有違俗之嗟幹才又無投閒之理隨時升沈與世委  
蛇亦宦游之一樂還山殆不如也局中可知優游爲善  
此時無所謂自見也闔運前尙有子和處撥用五十金  
未還以在家日少無暇及此茲承寄贈卽謹拜領仍交  
令弟子剛歸入家用示君兄弟同財之義眷念故交之  
情手書爲謝卽頌近安不具

致王知府

子常仁兄先生台席奉別卅三年人事變遷故交存沒  
不啻如丁令之歸城郭麻姑之歎海田千斛愁化爲五  
色雲皆文波詩料也以此間散遂至耆年孝達變爲洋  
人爽秋遂從鼂氏尤可駭矣獨吾兄名字時從佛名朝  
報見之兩舉特科皆爲領袞喜其健在笑其多情雖無  
因致書而清揚宛接今秋偶入城居弟近分子女爲三  
家一居長沙城一  
居湘潭鄉一從游見架上有書二函曾未發封啟之乃大集卅  
卷唱和詩廿卷詢大兒云初從都中還不知所自來小  
孫又言有手書已便寄衡陽弟竟未見惜此墨妙喜讀  
多文盛矣富哉交游門下之多賢皆使君倡導力也又

閩中友侍並有清吟不必女學無妨纏足尤足助吾張  
目矣日對百客不勝其煩猶盡讀六十餘卷而後還山  
念去後無從置郵謹因同鄉葉君先寄此信餘情不盡  
亦無由得盡得君心照而已專頌道安暇輒相思

致程通判

旣樵姻世二兄侍福去歲輶簡足徵衰懶入春多喜亦  
闕問箋頃奉來雲爲頌爲慰闔運城中百日如行荆棘  
廿二日到莊次日卽被敦促甚笑甚愠旣承雅命在家  
一日必代閱官課卷一日上學則必不能以撫臺迫我  
以制臺嚇我皆所不受也但不必宣言俟出游後無處

蹤跡自然止矣此頌雙祺不具

阮樵姻世二仁兄侍福奉書感荷端節前必不能來當俟事定遣船之說希即轉告前途免勞往返煤太累贅油可得千錢相應乞交餉船便付湘潭城內可也山西信甚不佳出主意者又重辦奇之奇矣此間數傳衡警必當應謠言也惟小心照料爲望

聞木料業承代購甚感甚感夏水大至附便至湘爲宜不必急急也鹽局章程定否有子姪數人專望混飯去年已面告可亭世兄

忘其號

今年米聞消息貴郡局事知

不能辭已開辦否坐待又恐失時今遣舍姪月生先行

求見或檄或桂務望賜書往謀一事其人久習商業頗  
爲穩實在敝族中尙爲老成不比瑞生卯金之流也能  
從指揮則尤妙耳聞粵鹽亦發小票闖運有改業之意  
每年以衡桂館金千元試辦不知可否如可俟四川還  
仍來教書學子夏名商也

阮樵姻世仁二兄近好別後馳騫無暇幸於月初脫歸  
約以明歲再往館已辭矣因竹軒欲借作膽心不能不  
再去也印書費心如書經版成乞交榜眼帶來爲幸船  
山不能兼顧今遣送關書其聘金已兌用乞於安記取  
票銀四兩令賢子加封籤並飭紀送往觀察處爲懇信

物并呈卽希照送眞南京鴨子一隻眞假南豐橘一隻  
聊佐屠蘇又周姬求九少爺袂篆屏四幅乞飭并交夏  
帶爲感今年辭去二千金畱下一千金夢寐不安年終  
尙須還文債也竹軒大有長進宜其開府惜閩運不能  
輔之以無交情之故其不能不去者禮意隆重之故并  
以附聞卽賀年喜

旣樵姻世二兄閣下得書並惠寄柚脯感謝感謝衡城  
暫別變故多端世上千年可爲歎憶福門安吉春宴多  
歡頌甚頌甚江西約須電追卽當奔赴講武非興文也  
去臘已約榜眼今無回報來留及陳信均未提及豈不

居衡州耶船山十年毫無功效自應辭退不關竹軒關  
書例須三退如再送來卽存尊處弟來去非紅書所能  
招致此理易明所以必退者便於彭傳臚薦人耳叔揆  
如須出游可同午詣同來我若先去亦可後來與午詣  
同伴但告以係鄙意便不嫌攀附矣此頌新禧

旣樵姻世仁二兄閣下前退關遂仍遺落已應再送之  
例矣今特專使二次送繳乞致觀察爲幸學堂與書院  
本是兩事但不可提書院租亦不必言不提俟學生齊  
教習到再議可也監督必須教官不用本地人無人想  
做監督自無人想興學堂矣此則官紳可自主者也鄉

中應酬極忙節後當入城避之狡兔有三窟人無奈我  
何矣去年面求收蔡氏子今遣叩見其母苦節此子膽  
小想仁者必矜恤也省中日日報假仗一敗一勝俱不  
是真事學堂人頗減色唐老守亦不必高興矣春雨新  
雷元宵添一詩料從無詠元夕雷者此可爲譚觀察一  
課題九郎來否紉女昨生一子劉壻想已入城謝媒瑞  
女入城請一嫂以近狀告之並頌潭福不具

致伍編修

別後數問起居無異面對每羨福壽難在聰明昨得來  
書猶如壯艾驚喜二歎若再晤談重宴鹿鳴諸老避席

做鄉富貴一老更不及矣此身健在他復何干坐閱盛  
衰益增學識去蜀廿載不減不生姦屬平安聊以自慰  
改學說起久欲進言以名字章聞嫌於生事適緣夏奏  
卽具呈本省督撫請代奏飭停躬至南昌辭聘還里因  
緣湊合得讀來書藉此要津復箋函丈日對百客心緒  
粗疏凡所欲言真同全史如錫公告去或可西游重訪  
君平一傾積想斯爲快耳導養多效冬福彌佳幸甚幸  
甚

致劉道臺

端亮仁世兄昆弟同鑒九月在城卽聞君家兄弟集於  
申甫

侯家比時應酬不遑未能奉訪李伯強兄見過致意云  
當枉顧祇候數日未得晤談登舟日始聞兒子言賢昆  
仲適以其日到舍歎仄何似仲冬由衡往醴亦於舟中  
得賜書具承謙逮垂問殷拳甚感甚感中丞公年輩稍  
前尊甫弟兄均同游至密羣紀之交與曾氏同世則有  
之太猶未也來稱過貶所不敢當至敘述遺業傳其齋  
志朋輩之內惟我深知直以未得來命故無從記述耳  
賤以千金微嫌幣美行時恩促遂交衡友暫存今年又  
將遠游無暇料理貲產俟歸時終當奉璧也碑志各一  
篇先行呈上以慰孝思行述附還或恐不當尊意仍請

大手筆點定除日手復不盡所懷順頌潭福不具

湘綺樓箋啟卷第六終